

wohin sie zu milden sachen damit geweist ain halb iar zuuorn anzeigen vnd die haubttsumma vnd alle vorsessene zins an sechsischer fursten muncz zu Meissen erlegen; wan solchs geschitt vnd ehr nicht soll diese vorsicherung todt vnd abe sein. Zu mehrem glauben ꝛc. Geben zu Dressen sonnabents nach Palmarum nach Christi vnsers lieben hern geburt tausent funfhundert vnd in dem funfundirczigsten iar.

Nach Acten des K. Finanzarchivs Rep. XXIII. Generalia No. 6^b. Bl. 208.

No. 523^e. 1545. 8. Apr.

Vonn gots gnadenn wir Moritz hertzogk zcu Sachssenn bekennen —. Nachdeme wir vnnserm stadthalter zu Dresdenn rathe vnd liebenn getrewen Ernntenn von Miltitz auff Batzdorff vor diser zceit das forwerck Korbitz mit dehnen darzu gehorenden frohnen vndt dinsten erblichenn vorkaufft vndt ihnen an vnnserer schule gegen Meissen mit dem kauffgelde gewiesenn inhalts vnd besage seyner kauffbriues, vndt aber die dorffer Prauschitz, Zcauschitz, Hoffichen vnd eyn pawer zu Plautzick zu demselbenn forwerck in allermassen wie sie zcuorn dem closter zu sanct Affran zcu Meissen gedinet auff vnser vorkeuffen zcudinen schuldick, vnd sich solcher dinst halben allerley vngehorsams vnd vnrichtikeit zwuschen ihme vnd den leuthen, da die dorffer vnder andere bothmessikeit sein solten, zcutragenn mochtten, das wir ihme soliche dorffer heut dato, nemblich im dorff Prauschitz eilff schock sechs pfennige an gelde, funff scheffel drey virttel kornn, funf scheffel drey virttel haffer, ein schock neun huner auff Michaelis, funff schock virzehenn groschen an gelde, zcehenn schock funfzick eyer auff Walpurgis; zu Zschauschitz auff Michaelis sibenn schogk viervndzwanzig groschen, drytthalbe schock eyer vff Walpurgis an gelde, achzcehenn huner; zu dem Hofichen auff Michaelis drey schock zwey vnd funfzig groschen an gelde, sechsthalben scheffel weitzen zcehen huner, auff Walpurgis dritthalb schogk eyer. Item die leute zcu Zcigennhain haben etliche stuck acker gegenn Hofichenn gehorig, dauonn zcinsenn sie auff Michaelis vir vnd virzick groschenn zwey huner. Item Michel Pruncker zcu Maschitz von einer hufen kegen Hofichenn gehorig vyr vnd zwanzigk groschenn, zu Plautiz eyn schock acht vnd zwanzigk groschen am gelde, ein scheffel korn, ein scheffel hauer vndt dreyzcehenn huner auff Michaelis, ein schock zwanzick groschen, dritthalb schogk eyer auff Walpurgis verkaufft vndt ihe eynen scheffel kornn vor acht groschen, eynen scheffel haffer vor vier groschen, eynen scheffel weitzen vor zcehen groschen, ein hun vor eynen groschen vnd eyn schock eyer vor zwene groschen angeschlagen haben; treggt alles an gelde in einer summa sechsvnddreissick schock dreyzcehen groschen. Verkeuffen ihme die hirmit crafft ditz bryfes vnd habenn ihme die gegeben ihe ein schogk sampt dem erbgerychten vor vier vnd zwanzick gute schock, thut in eyner summa achthundertt neun vnd sechzick gute schock zwelff groschenn ader zweytausent vierhundertt drey vnd achzick gulden neun groschen. Diweil auch nachgeschriebene holzleitten, nemblich die leitthe an der grossen Tribissen an dem wasser auff der eynen seitten von Korbitzer leitten biß an Dobrich vnd auch Karsebecker gutter vnd bereynung hinauff, vnd vonn der andernn seyten von Goltgrundt